

Aalisartunut qaleralinnik paggatassiilluni aalisarsinnaanermik akuersissuteqartunut angallatip annerpaaffissaanik piumasaqaat 9 miiterimut qaffanneqassappat, aalisartunut inuiaqatigiinnullu sunniutissai pillugit Naalakkersuisut misissueqqullugit peqquneqarnissaanik inatsisartut aalajangiiffigisassaattut siunnersuut. Misissuinermit inernerit kingusinnerpaamik UPA2023-imi inatsisartunut agguanneqassapput.

Siumup Inatsisartunut ilaasortaataitai

pillugu

Aalisarnermut, Piniarnermut Nunalerinermullu Ataatsimiititaliap

siunnersuutit aappassaaneerpeqarnerannut

ISUMALIUTISSIISUTAI

Inatsisartunut ilaasortaq Hans Aronsen, Inuit Ataqtigiit, siulittaasoq
Inatsisartunut ilaasortaq Jens-Frederik Nielsen, Demokratiit, siulittaasup tullia
Inatsisartunut ilaasortaq Jens Kristian Therkelsen, Siumut
Inatsisartunut ilaasortaq Mala Høy Kúko, Siumut
Inatsisartunut ilaasortaq Agathe Fontain, Inuit Ataqtigiit
Inatsisartunut ilaasortaq Charlotte Pike, Inuit Ataqtigiit
Inatsisartunut ilaasortaq Hans Enoksen, Naleraq

UPA2022-mi ulloq 4. maj 2022-mi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Siusinnerusukkut siunnersuutigineqartunut UKA2019/28 & UPA2020/28 malitseqartitsilluni siunnersuutaavoq. Angallatinut piumasaqaatit 6 aamma 9 miiteriet akornannut allanngortinneqassagaluarpata aalisartunut inuiaqatigiinnullu qanoq kinguneqassanersut taakkunani ukkatarineqarpoq. Januarimi 2021-mi tamanna pillugu¹ nassuiaammik pisortatigut saqqummiussisoqarpoq.

¹ aalisarnikkut angallateeqqanik pisassiissuteqarfiusunik minnerpaaffiliinissami takissuseq 9 meter aallaavigalugu pitsaaqqutinik ajoqutinillu nassuiaateqqullugit ukiuni 12 ikaarsaariarfeqartillugit Inatsisartunut nassuiaat

Matumani siunnersuutigineqartoq erseqqarinnerusumik suliaavoq, tassa kingunerisinnaasat pillugit misissuisoqassasoq qaleralinniarnissamut paggatassiisoqartillugu angallatit angissusii qulaani taakkartorneqartut ilanngunneqarnerisigut.

§37 naapertorlugu apeqquteqaammi nr. 2022-34-mi akissut 2-mi paasissutissiisutigineqarpoq allannguinerup kingunerisinnaasaasa misissorneqarnissaat piffissamik nukinnillu annertuumik atuiffiussasoq. Allannguisoqannginnerani una siunnersuut aqqutigalugu ilisimasat annertunerusut pissarsiarineqarsinnaassapput.

2. Ataatsimiititaliap siunnersuutininik suliarinninnera

Siunnersuutip siullermeerneqarnerani aalisartunut isumannaallisaanerup sulinermilu atugassarititaasut pitsanngorsarneqartariaqartut partiit tamarmiullutik oqaatigaat.

Siunnersuut taamatut isikkoqartillugu itigartinneqassasoq ikinnerussuteqartunit inassuteqaatigineqarpoq. Tassunga misissuinerup sivikitsuinnarmik ingerlanneqarsinnaanera tunngavigineqarpoq, Aalisarnej pillugu Ataatsimiititaliarsuup innersuussutai tunngavigalugit aalisarnerup iluani allannguisoqarujussuarnissaanik eqqarsaatersuuteqartoqarnera peqqutaalluni.

Isumannaallisaaneq.

Imaani isumannaallisaaneq UKA2019/28-p & UPA2020/28-p nalaani eqqartorneqangaatsiarpoq.

Piujuaannartitsisumik aalisarnerup qulakkeernejarnissaa pillugu Aalisarnej pillugu Ataatsimiititaliarsuup suliaqarnerani nassuiaasiassap atorneqarnissaa taamanikkut ataatsimiititaliamit eqqumaffiginiarneqarpoq.

Nassuiaat² 2021-mi upernaakkut piareerpoq.

Aalisarnej pillugu Ataatsimiititaliarsuup isumaliutissiissutaani juli 2021-meersumi tamanna pillugu aamma annertuumik eqqarsaatersuuteqartoqarpoq.

Aalisarnermut Piniarnermullu Naalakkersuisup siunnersuummut matumunnga akissuteqaammini eqqaavaa atuisut ilisimasaannik sulii katersisoqartoq tamannalu 2022-mi aasaq naallugu ingerlanneqassasoq naatsorsuutigineqarluni. Tamatuma kingorna siunnersuuteqartoqarumaartoq suliniutit qanoq ittut Naalakkersuisunit atorneqarniarnersut pillugit.

Imaani isumannaallisaanerup annertunerulernissaa oqaatigineqattaarpoq, soorlu assersuutigalugu systeminik nunap sananeqaataasa inissisimaffiinik nakkutiginnittussanik allanillu ikkussuisoqarluni. Tassungali pisariaqarpoq atortut atornissaannut atuisut tatiginnissinnaallutillu iluameersumik ilisimasaqarnissaat.

^{2 2} aalisarnikkut angallateeqqanik pisassiisuteqarfiusunik minnerpaaffiliinissami takissuseq 9 meter aallaavigalugu pitsaaqutininik ajoqutinillu nassuiaateqaqqullugit ukiuni 12 ikaarsaariafeqartillugit Inatsisartunut nassuiaat

Angallatip annertussutsimut uuttuut atorlugu 20³ sinnersimappagu Imarsiornermik Aqutsiveqarfiup angallat misissussavaa akueralugulu, Imarsiornermillu Aqutsiveqarfimmi nalunaarsuiffiani nalunaarsorneqassalluni. Tamanna aningaasartuuteqarfiusinnaavoq, ilaatigut aningaasaliissuteqarnissamut piumajunnaartitsisinnaallutik.

Aalisartut anginerusunik angallatitaarusunnginnerannut allanik peqquteqarsinnaavoq.

Aningaasaliinissaq eqqarsaatigalugu angallammut 9 miiterit tikillugit angitigisumut umiatsiaaqqamut 6 miiterisut angitigisumut sanilliullugu annertunermik aningaasaliisoqartussaassaaq. Tamannalu ima isumaqarataannaavoq aningaasatigut inissisimalluarnerusut kisimik anginerusumik angallatitaarnissaminnut aningaasaliiffiqarsinnaassasut.

Kalaallit Nunaanni Aalisarsinnaanermut Akuersissutinik Nakkutilliisoqarfimmit siusinnerusukkut ingerlatsisoqarnikuuvoq, inuussutissarsiutigalugu aalisartut tamarmik 6 miiteri sinnerlugu angissusilinnik angallataatillit pisaminnik nalunaaruteqartassasut akileraartarnermut naatsorsuutitut pisallu annertussusaanik naatsorsueqqissaanermut atugassanik. Piffissaq eqqorlugu tunniussisoqartanissaa 2017-imi unamminartinneqarnikuuvoq. Teknikkimut tunngasunik ikiuutinik amigaateqarneq siunnersuisartunilluunniit ikiortissaqannginneq peqqutaanersut ilisimaneqanngilaq. Angallatit 6 miiterit ataallugit angissutilinnut piumasaqaat taanna atuunnikuunngilaq.

Qalerallit

Inersuarmi oqallinnerup nalaani eqqaaneqarpoq qalerallit pisarineqartut eqqarsaatigalugit kingunerisinnaasai pillugit ilisimasaqarnissaq kisimi soqutiginaruunngitsoq. Angallatit taakkua atorlugit aalisakkanik allarpassuarnik aamma aalisartoqartarpoq. Aalisarneq pillugu Ataatsimiititaliarsuup isumaliutissiissutaani qaleralinniarnermut tunngasut misissoqqissaarneqarput innersuussuteqartoqarlunilu. Taakkua ilai Naalackersuisunit suliarineqassagaluarpata siunnersuutip matumani pineqartup suliarineqarnerata kingorna misissuinerup imarisassaanut attuumassuteqarnissai ilimanarluinnarpoq.

Paggatassiissutinik aalisarneq

Siullermeerinninnermi eqqaaneqarpoq paggatassiilluni aalisarnissamut pisassiissutit sukkanerusumik pisarineqartarnissaat naatsorsuutigineqassasoq angallatit anginerulersinneqassappata.

Angallatit 6-9 miiterit akornanni angissusillit amerlanerusut angallatinut maannakkut piusunut sanilliullugit pisassiissutinik sukkanerusumik aalisartarnissaat ilimagineqarpoq. Paggatassiilluni aalisarneq aallartikkaangat angallatit anginerusut siviunerusumik imaaniinnissaminnut periarfissagissaarnerusunit aalisartoqarnerulertarnissaa ilimagineqarpoq.

³ Annertussutsimut uuttuutit (angallatip takissusaa silissusaalu)

Massakkut qaammatikkaartumik imaluunniit qaammatit pingasukkaartumik paggatassiilluni aalisarnissamut pisassiisarneq sungiusimaneqartoq artukkiinerulersinnaavoq, assersuutigalugu aalisarnermik matusisariaqalersitsilluni. Aalisarneq pillugu Ataatsimiititaliarsuup isumaliutissiissutaani tassunga tunngasunik aamma innersuussuteqarpoq siunnersuummut matumunnga attuumassuteqarsinnaasunik.

3. Siunnersuutit aningaasaqarnikkut kingunerisassai

Inatsisartut suleriaasianni § 33, imm. 1-imi ima allassimavoq, siunnersuut tunngavilersugaassasoq siunnersuutillu aningaasatigut allaffissornikkullu kingunerisassai allaaserineqarsimassallutik, aalajangiiffigisassatut ilusilerneqarsimassalluni taaguuserneqarsimassallunilu.

Siunnersuut piviusunngortinneqassappat aningaasatigut kingunerisassai siunnersuummut naapertuuttumik allanneqarsimasut ataatsimiititaliamit paasineqarpoq. Nassuiaasioorneq A/C-p ataatsip sulineranik akeqartussatut siunnersuuteqartumit nalilerneqarpoq.

Tamanna pillugu ataatsimiititaliaq oqaaseqaatissaqanngilaq.

4. Ataatsimiititaliap inassuteqaatai

Misissuinerup taassuma imarisai siunissami aalisarnermut piniarnermullu inatsisip nutarterneqarnissaanut sulineranut ilanngunneqarnissaa ataatsimiititaliamit Naalakkersuisunut kaammattuutigineqarpoq.

Amerlanerussuteqartut Inuit Ataqtigiinneersut aamma Siumumeersut siunnersuutip akuerineqarnissaa inassuteqaatigaat.

Ataatsimiititaliami **ikinnerussuteqarluni** Demokraatineersup siunnersuutip **itigartinneqarnissaa** inassuteqaatigaa.

”Demokraatini isumaqatiginngilarput nalunaarusiaq suliarineqarnissa Naalakkersuisut neriorsuutigimmassuk ukiaanerani aalisarnermut inatsisissaq saqqummiunneqassasoq. Inuiaqatigiit akileraarutaat isumatusaartumik atussuagut taamaammat nalunaarusiornissamut pisariaqanngittumut aningaasartuuteqassanngilagut.”

Ataatsimiititaliami **ikinnerussuteqarluni** Naleqqameersup siunnersuutip **itigartinneqarnissaa** inassuteqaatigaa.

“Umiatsiaqqat 9.mtr aalisartunut qaleralinnik paggatassiilluni aalisarsinnaanermik akuersissuteqartunut angallatip minnerpaaffissaanik piunasaqaat siunnersuut pillugu imatut oqaaseqassaagut.

Uani siunnersuummik anguniagaasoq tunngaviatigut akerlerinngilarput kisianni akuersaanngilarput Aalisarnermut ataatsimiititaliarsuup suliaanut innersuussisaqattaarluni suliaq kinguarsartaarnissaq tmannalu suliniarnermut siuarsaataani kinguarsaataaginnartussaammat.


Tassami Aalisarnermut ataatsimiititaliarsuup sulinini naammassillugu innersuussut atuaganngorlugu saqqummiutereermagu suliaq kinguarsartariaqanngimmat nutaanik ikkussuiniarsaraluni.

Taamaattumik taamatut siunnertalimmik suliassanik aalisarnermut ataatsimiititaliarsuarmut sulianik nutaanik ilaartuinissaq isumaqataaffiginngilarput itigartillugulu.”


Taama oqaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Hans Aronsen
Siulittaasoq



Jens-Frederik Nielsen
Siulittaasup tullia




Agathe Fontain



Charlotte Pike



Jens Kristian Therkelsen



Mala Høy Kúko



Hans Enoksen